

Program Food Bank Siswa bantu 17,954 pelajar

Mohd Rafi Mamat - April 9, 2021 @ 9:13am

bhnews@bh.com.my



Menteri Perdagangan Dalam Negeri dan Hal Ehwal Pengguna, Datuk Seri Alexander Nanta Linggi (tengah) menyampaikan bantuan kepada pelajar pada Pelancaran Program Food Bank Siswa Ke 27 di Politeknik Muadzam Shah - Foto NSTP/Mohd Rafi Mamat

MUADZAM SHAH: Seramai 17,954 pelajar seluruh negara menerima sumbangan bantuan Program Food Bank Siswa sepanjang pengajian mereka.

Menteri Perdagangan Dalam Negeri dan Hal Ehwal Pengguna, Datuk Seri Alexander Nanta Linggi, berkata inisiatif Food Bank Siswa diwujudkan bertujuan menyalurkan bantuan makanan kepada pelajar yang memerlukan dan pada masa sama, membantu meringankan beban sara hidup yang ditanggung mereka.

Katanya, program Food Bank Siswa yang digerakkan oleh Sekretariat Food Bank Malaysia, Kementerian Perdagangan Dalam Negeri dan Hal Ehwal Pengguna

(KPDNHEP) adalah polisi yang diwujudkan bagi membantu pelajar kurang berkemampuan mendapat makanan serta keperluan harian.

"Program Food Bank Siswa menjadi platform turut membentuk semangat serta budaya sukarelawan dalam kalangan pelajar selain menerapkan nilai sifar pembaziran.

"KPDNHEP mengalukan pembabitan semua pihak termasuk Persatuan Pelajar dan pengurusan IPT untuk bersama dengan KPDNHEP dalam mengalakkan penglibatan sukarelawan di dalam program ini," katanya.

pada pelancaran Program Food Bank Siswa Ke-27 di Politeknik Muadzam Shah (PMS), di sini, semalam.

Alexander berkata, seramai 1,200 pelajar PMS menerima sumbangan bantuan Program Food Bank Siswa sepanjang pengajian mereka.

Katanya, Program Food Bank Siswa di PMS menggunakan konsep Food Pantry di mana pihak Hal Ehwal Pelajar (HEP) menyediakan tempat penyimpanan makanan kering untuk diagihkan kepada pelajar mengikut jadual ditetapkan.

"Program Food Bank Siswa turut mengalukan pembabitan pelajar terutama persatuan pelajar sebagai

penggerak program dengan berkonsepkan, 'Daripada Mahasiswa kepada Mahasiswa'," katanya.